



KEMENTERIAN PERTANIAN DAN KETERJAMINAN MAKANAN

Ministry of Agriculture and Food Security

Wisma Tani

No 28, Persiaran Perdana, Presint 4

Pusat Pentadbiran Kerajaan Persekutuan

62624 PUTRAJAYA,

MALAYSIA

No. Telefon : 03-8000 8000

No. Faks : 03-8888 6020

Laman Web : www.kpkm.gov.my

SIARAN MEDIA

**LAWATAN MENTERI PERTANIAN DAN KETERJAMINAN MAKANAN KE
INDONESIA: FOKUS KEPADA KERJASAMA DUA HALA, INDUSTRI PADI
DAN KETERJAMINAN MAKANAN SERANTAU**

PUTRAJAYA, 24 APRIL 2025 - YB Datuk Seri Haji Mohamad bin Sabu, Menteri Pertanian dan Keterjaminan Makanan telah melengkapkan lawatan kerja beliau ke Republik Indonesia yang bermula pada 20 April 2025..

Indonesia merupakan salah satu rakan dagang utama Malaysia dalam sektor pertanian. Pada tahun 2024, jumlah dagangan antara kedua-dua negara mencecah RM18.05 bilion. Dalam sektor agro-makanan khususnya, Indonesia muncul sebagai rakan dagang ketiga terbesar Malaysia.

YB Menteri memulakan lawatan kerja beliau dengan mengiringi YAB Dato' Seri Diraja Dr. Ahmad Zahid Hamidi, Timbalan Perdana Menteri dalam pertemuan rasmi bersama Wakil Presiden Indonesia, TYT Gibran Rakabuming Raka. Semasa sesi ini, pelbagai inisiatif telah dibincangkan untuk memperkukuhkan lagi hubungan dua hala oleh kedua-dua pemimpin tersebut termasuk sektor pertanian dan kerjasama strategik dalam perikanan.

YB Menteri juga telah mengadakan kunjungan hormat ke atas rakan sejawatnya, TYT Dr. Ir. H. Andi Amran Sulaiman, Menteri Pertanian Republik Indonesia. Sesi perbincangan tertumpu kepada bidang-bidang strategik yang menjadi kepentingan bersama seperti industri padi beras, tenusu, makanan ternakan, kelapa dan jagung bijian yang memainkan peranan penting dalam isu keterjaminan makanan kedua-dua negara.

TYT Dr. Amran turut berkongsi inisiatif transformasi pertanian Indonesia, termasuk penggunaan teknologi pintar, sistem penanaman padi tiga musim setahun, serta pembangunan varieti padi unggul seperti IPB 9G yang berpotensi tinggi dari segi produktiviti dan ketahanan tanaman. Dalam perbincangan tersebut, kedua-dua pihak turut menjejaki peluang kerjasama rentas sempadan di Kalimantan Barat dan Kalimantan Utara, serta potensi pembangunan ladang berskala besar di Kalimantan Tengah dan Papua Selatan.

Di akhir lawatan kerja beliau, YB Menteri berkesempatan mengadakan lawatan dan perbincangan bersama kepimpinan Perusahaan Umum BULOG (Perum BULOG), sebuah agensi utama Indonesia dalam pengurusan stok makanan asas. Sesi ini memberi tumpuan kepada potensi kerjasama dalam sektor padi, pengurusan rantai bekalan makanan, penyimpanan stok strategik dan sistem logistik makanan.

Sebagai Pengerusi ASEAN, Malaysia terus komited untuk memperkukuh agenda keterjaminan makanan serantau melalui kerjasama strategik dengan negara-negara jiran. Lawatan ini mencerminkan kesungguhan Malaysia dalam menghadapi cabaran global dan membina ketahanan sistem makanan yang berdaya saing dan mampan di rantau ini.

Lawatan YB Menteri ke Indonesia ini turut disertai oleh YBhg. Datuk Badrul Hisham bin Mohd, Timbalan Ketua Setiausaha (Pembangunan); YBhg. Dato' Haji Adnan bin Hussain, Ketua Pengarah Perikanan Malaysia; serta pegawai-pegawai kanan KPKM.

KEMENTERIAN PERTANIAN DAN KETERJAMINAN MAKANAN

24 APRIL 2025